



Rabu, 31 Januari 2024
Ogen: Lukas 16:10-12



Tutus I bas Si Kitik



Tep-tep jelma ndatken kesempatan si seri (equal opportunity) i bas Tuhan nari gelah banci turah ras erbuah bas kegeluhen enda. Amin gia pelain-lain biak dengen pendilonta ibas kegeluhen tep-tep wari siidah maka kerina e me pemere Dibata, em si payona iakap Tuhan man banta. Lit kalak si pendilona kin jadi guru, perbinaga, perjuma, agen jasa, rsd. Lit pe idilo Tuhan jadi ibu ntah pe bapak rumah tangga. Kerina e pendahin si mulia, asal si dahiken alu tanggung jawab ras ermeriah ukur.

Keriahen ukurta ndahiken dahin e megati iugur alu prinsip materi ntah pe secara duit. Emaka tempa-tempa lit piga-piga dahin si la secara langsung menghasilkan duit iakap e dahin si la mantap ntah pe dahin si kitik. Duit labo tujun pendahin. Arah kata Dibata, duit e ula jadi tujun geluh, tapi bahanlah duit jadi alat, alat ndatken teman, alat guna ndungi dahin, alat raduken ras perlengkapan si deban gelah tersehi kita kai kin si jadi sura-sura Dibata. Emaka suruh Tuhan setia bas perkara si kitik, sebab kerina si mbelin rehna arah si kitik nge lebe. Tapi adi leben ateta ngerauk, tapi njemput pe langa megegeh tanta, tentuna siijemak kita e pe banci naktak, sia-sia.

Kekelengen Tuhan, kesempatan guna ndatken pasu-pasu seri nge ibereken Tuhan, saja deban ibere Dibata modal 1, 2, ras 5 talenta. Tep-tep talenta simaba mbelin tanggungjawabna jine. Ola morah ate 1 talenta nandagi 5, labo soal buena siitimai Tuhan, tapi siniarapkenna erbuahlah min talenta e. Adi talenta e benihna, ketutusen e cara pengelolanna, ise si sikap ngaturkenca maka benih e pasti turah merambis buahna. Ola sangsi benih si sitik arah pasu-pasuNa banci erlipat ganda. Tetaplah tutus amin kitik rarsen gia.